

## ❖ TYRD I LAWR

*Tyrd i lawr, O Arglwydd, a gwna dy enw'n hysbys i'th elynion:*

tyrd i lawr, Arglwydd, a rho'r byd yn ei le;  
 tyrd i lawr a dangos dy hun i'r rhai sy'n dy wrthod;  
 tyrd i lawr a gwna i'r cenhedloedd grynu:  
 ond daethost i lawr, Arglwydd,  
 ac nid adnabuom di.

*Tyrd i lawr, O Arglwydd, er mwyn i ni gael ein hachub:*

tyrd i lawr, er mwyn i ni weld dy wyneb  
 yn llewyrchu arnom ac yn ein hadfer;  
 tyrd i lawr, ac yna ni thrown ni oddi wrthyt mwyach:  
 ond daethost i lawr, Arglwydd,  
 a chefnasom arnat.

*Tyrd eto, O Arglwydd, i'n hadfer ni:*

yn dy amser dy hun, tyrd eto  
 er mwyn galw dy bobl ynghyd  
 i gyflawni dy ewyllys dragwyddol  
 a dod â buddugoliaeth derfynol dy deyrnas sanctaidd i'r amlwg:  
 ond cydnabyddwn, Arglwydd,  
 fod angen i ni ein paratoi ein hunain  
 at y dydd mawr hwnnw.

*Felly, tyrd eto, Arglwydd:*

yn nhymor yr Adfent, tyrd i'n calonnau,  
 er mwyn i ni, fel tanwydd, gael ein tanio gan angerdd,  
 ac fel dŵr berwedig fyrlymu o lawenydd;  
 ac wrth i ni daer ddisgwyl dy ailddyfodiad,  
 na ad i ni gefnu arnat,  
 ond gad i ni gael ein hadfer,  
 a'th gyffesu di yn Arglwydd, Creawdwr,  
 a'n Tad cariadlon a maddeugar.

*o Gweddio 2002–03*